

Jaanju-janampa mirlimirli ngaanya nampa yupalpa kurtingu

¹ Jijajmili walyjakajalurniya wajani, yini jilanya, “Jiinya-lampa maaja jirlpi.” Ngayulurnangku Jaanju mirlimirli ngaanya wakara kurt-
ingku, Kiyajku, Jijajmili walyjalun kulilku-
raku. Ngayurnangku pukurlpa nyininpa.

² Nyuntulurni kulila!, ngayumili walyjalu. Ma-
marnangkura japilpayi nyuntunta ngampurrju
kanyilkura, kunyjnyu ngarntaparni. Ngayu-
lurnanta nintilu kulini, nyunturan Jijajmili wa-
lyja jungaran nyinani. ³⁻⁴ Jijajmili walyjaka-
jalurniya yanu jakurljunu, nyunturan junga
nyinani Mamamili wangkaku. Jakurlkajarna
kulilpayi Jijajmili walyjakajaya junga nyinin,
Mamamili wangkaku, palujanurna-nyurrampa
ngayu pukurlminyirri nyinani.

Kiyajpa Jijajmili walyja junga nyinapayi

⁵ Ngayumili walyja, pukurlparnangku
nyinani, jumajin kunyjnyukaja ngapini
Jijajmili walyjakajaku. Karlkinpaya wamparla
nyinani, jikajakulurrju-janampan kunyjnyu
ngapilpayi. ⁶ Jikajalu-lanyajuya yanuka
jakurljunu nyuntulu-janampan kunyjnyu
ngapilpayi, ka-janampan layikamu nyinapayi.
Jijajmili wangkaya parra jakurljuninpa
kaya yaninpa nyuntumili ngurrawana.

Nyuntulu-janampa kunyjyunyu ngapila!, mawu yankuraya parra jakurljunkturana, ngurra kujupangkakamu ngurra kujupangka. Murrarnilula jilanyalu kunyjyunyu ngapini, jampaya Jiiijajmili wangka parra wajani. Jilanyakura Mama pukurlarrini. ⁷ Jiikajaluya julyju kulilpayi ngurra walyjangkalu jilanya, “Jiiijajmili wangkala-jananya parra wajalku. Ka mirtala-jananya manikamu mirrka manku, parlanykajangka, Jiiijajmili walyjangkawiyajula-jananya manku mirrkakamu manikaja.” ⁸ Palujanu ngayurtinjula-janampa Jiiijajmili walyjakajaku kunyjyunyu ngapilkura, manikamu mirrkala-jananya yungkura, jampaya Jiiijajmili wangka parra jakurljuninpa. Yiipila-jananya jilanyalu yaalpamulku, palujanuya yarnngalu martukajalu kulilku Jiiijajmili wangka.

Tayaturappakamupula Timitirijpa julyju nyinapayi

⁹ Nyuntumili tawunjaya kujungkarrini Jiiijajmili walyjakaja. Tawun jiikartirna-jananya julyju Jiiijajmili walyjakaja yupalpa kurtingu mirlimirliwinti. Jaajpurlukalu maajalu yini Tayaturapju ngayumili wangka mirlimirli palungka riitamunu ka kulinu junu, mirta-janampa jiikajaku yupalkajaku pukurlarringu, paki. ¹⁰ Mayitpirna ngula yanku, karnalu Tayaturapja wajalku, jumaji-lanyaju wululu jankapayi. Ka-janampa Jiiijajmili walyjakajaku wirrirlijanukajaku jankani. Nyuntumili tawunja, jiiimartajiya Jiiijajmili walyjakaja pukurlarrini-janampaya wirrirlijanukajaku,

ka-jananya Tayaturapju wajara kurtingkuni, jaajingkamarra, jumajiya kujungkarrijaku.

¹¹ Ngayumili walyjalu wangka ngaanya kulila! Jiinya maaja Tayaturappa walyku nyinani, mirtan jilanyayuru nyuntu nyina! Karlkinpaya Jiijajmili walyjakaja kunyjunyu nyinani, palunyayurun kunyjunyu nyuntu nyinaku. Yiipi martulu Jiijajmili walyjalu kunyjunyu ngapilku, palujanu yilta Mamamili walyja nyinani. Yiipi martu kujupalu Jiijajmili walyjalu mirta kunyjunyu ngapilku, palujanunga mirta Mamamili walyja nyininpa.

¹² Ngulantaya martu kujupa Jiijajmili walyja, yini Timitirijpa mawu yanku nyuntumili ngurrawana, kayilaparayan pukurlarriku nyinaku, kayilaparayan kunyjunyu ngapilku. Jiijajmili yarrngaraya paluku pukurlarrini, ngayurtinpalurrju. Jungalurnanta jilanya wajani.

¹³ Ngayulurna kulini wangka kujupakajaranta wajalkura. Ka mirtarna mirlimirlingka ngaangka wakalku, ¹⁴ kurlungarnanta yanku ka ngayulu walyjalu wajalku.

¹⁵ Mamarnangu japini, pukurlpan nyinakura. Ngaamartajiluya nyuntumili miirtikajalu wajani, “Kunyjunyulaju nyininpa.” Nyuntumili miirtikajaya jiiangka nyininpa, kajuya karlkinpa ngayumili miirtikajalurrju nyininpa. Jiikajangka-jananya wajala!, ngayurna kunyjunyu nyininpa.

Jiijajmili walyjakajaya ngaangka kujungkar-rini. Jiikajaluntaya wajanu, “Ngayurtinpalara kunyjunyu nyinani Jiijajku.”

**Mamamili Wangka
Portions of the Holy Bible in the Martu Wangka
language of Australia**

copyright © 1999 Bible Society of Australia

Language: Martu Wangka

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-21

PDF generated using Haiola and XeLaTeX on 11 Nov 2022 from source files dated 22 Nov 2019

4012452d-4a59-52ec-a42c-bdeca0ab4ea2